

四庫全書

集部

欽定四庫全書

集部

宋詩紀事卷九十六

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱所

謄錄監生臣蔣鳳柱

欽定四庫全書

宋詩紀事卷九十六

錢塘厲鶚撰

南鄭殿丞

句

青鳥幾傳王母信  
白鵝曾換右軍書

楊文公談苑

太學生

和張乖崖

四窗滅盡讀書燈  
窗外唯聞步鐸聲  
幸負江山好明月

閒來此地趁虛名

晁氏客語

李善寧子

貧家壁

椒氣從何得燈光鑿處分  
拖涎來藻飾唯有篆愁君

清吳錄臨川李善寧之子十歲能即席賦詩親友嘗以貧家壁試之畧不構思拖涎指蝸牛也

蜀州錄事參軍

句

秋光都似宦情薄  
山色不如歸興濃

夢溪筆談張忠定知成都有錄事參軍投牒乞  
致仕仍獻一詩云云忠定稱賞還牒禮為上客  
楊黎州

句

山川百蠻國雨露九天書

至

胡越自為迥遞國參商元

是別離星

寄遠

剛腸欺竹葉衰鬢怯蘆花

自詠

人歸漢后黃

金屋燕在盧家白玉堂

春晝

楊文公談苑

陳彭年甥

題黃敕背

彭年頭腦太冬烘眼似朱砂鬢似蓬紕繆幸叨三字內  
荒唐仍在四人中取他權勢欺明主落却親情賣至公  
千百孤寒齊下淚斯言無路達堯聰

江南野錄陳彭年大中祥符間同知貢舉省勝  
出有甥不預選怒入其第會彭年未來于几上  
得黃敕乃題其背云云彭年怒抱敕入奏章聖  
見而不悅然釋其罪

錢唐尉

謝杭州守王公

當年同試大明宮文字雖同命不同我作尉曹君作相

東君元沒兩般風

揮麈餘話王文穆欽若以故相來守杭州錢唐  
一老尉蒼頭華髮矣文穆初甚不樂詢其履歷  
乃同年生惻然哀之遂封章于朝詔特改京秩  
尉以詩謝之

幕僚

贈魏野

怪得名稱野元來性不羣借冠來謁我倒屣起迎君

溫公續詩話野少時未知名嘗題河上寺柱云  
數聲離岸櫓幾點別州山時有幕僚本江南文  
士也見之大驚遂與相見贈詩云云仍為之延  
譽由是人始重之

高士

贈种放

接得山人號舍人朱衣前引到蓬門莫嫌野藪無多味  
我是三追處士孫

池北偶談种放賜告西歸有一高士隱居三世  
以野藪一盤詩一章贈之

江上漁父

句

十年江上無人問兩手今朝一度叉



春渚紀聞關子東云范希文常于江上見一漁父意其隱者也問姓名不對留詩一絕而去記其兩句

### 葛通議

葛通議丹陽人侍郎立方之曾祖失其名

### 句

藻思舊傳青管夢哲科新試碧雞才乍依平仲蓮花幕  
更下溫郎玉鏡臺

韻語陽秋蔡君謨娶余祖姑清源君已而赴漳南幕余曾祖通議贈詩云云可謂佳句矣

李殿丞

李殿丞汜水人

餞魏主簿廣席上作

今日不知明日事人情反覆似車輪我今自是飄萍客  
更向長亭作主人

聞見前錄李殿丞與主簿素相好嘉祐中李攝河南倅檄廣權幕官相從益歡監司以燕會數俱罷歸故官廣先去李餞之云云

曹南院幕客

獻曹南院

賢守新成蓋代功  
臨危方始見英雄  
三都谷路全師入  
十萬胡塵一戰空  
殺氣尚疑橫塞外  
捷音相繼徧寰中  
君王看降如綸命  
旌節前驅馬首紅

後山詩話曹南院為秦帥喻氏方興舉國入寇  
公自出禦之戰于三都谷大敗之喻氏遂衰其  
府幕獻云云

蓮池生

題龍眠畫鬼章牽錦膊驄

漢武愛名馬將軍出西征蹀血幾百萬侯者七十人區  
區僅得之登歌告神明後來龍眠子心通大宛城落筆  
動九州俊氣橫四溟迢迢歷萬里矯首瞻彤庭不假貳  
師力汲黯何庸爭重譯自朝貢天王今聖明

式古堂畫考

縣尉

荅舉人索米

五貫九百五十俸省錢請作足錢用妻兒尚未厭糟糠  
僮僕豈免遭飢凍贖典贖解不曾休啣酒啣肉何曾夢

為報江南癡秀才更來謁索覓甚甕

夢溪筆談嘗有一名公初任縣尉有舉人投書索米戲為一詩荅之熙寧中例增選人俸錢不復有五貫九百俸者此實養廉隅之本也

洪浩父

寄子

太學何蕃且一歸十年甘旨誤庭闈休辭客路三千遠  
須念人生七十稀腰下雖無蘇子印篋中幸有老萊衣  
歸時定約春前後免使高堂賦式微

蓉塘詩話餘杭進士洪浩熙寧中游太學十年  
不歸其父作詩寄浩浩得詩即日歸養

### 陝府知縣

#### 戲書僧房窗紙

爾非慧遠我非陶何事窗間酒一瓢  
僧野避人聊自醉  
臥看風竹影蕭蕭

王暉道山清話范堯夫帥陝府有屬縣知縣因  
入村至一僧寺少憩既飯步行廊廡間見一僧  
房頗雅潔閑無人聲案上有酒一瓢知縣者戲  
書一絕于窗紙云云不知其僧俗家先有事在  
縣理屈作罪明日其僧乃截取窗字黏于狀前  
訴于府且曰我有施主某人昨日攜酒至房中

值某不在房知縣既至施主走避酒為知縣所飲不辭但有數銀杯知縣既醉不知下落銀杯但有鐫識今施主迫某取之乞追施主某人與廳吏某人鞠之堯夫曰爾為僧法當飲乎杖而逐之且曰果有失物今主者自來理會持其告以示子姪輩曰爾觀此安得守官處不自重即命火焚之對僚屬中未嘗言及後知縣者聞之乃修書致謝堯夫曰不記有此事自無可謝還其書

## 楊尚書

## 與高氏子

十數年來聾耳慣可將社酒便能醫一心更願青盲了

免見高家小馬兒

墨客揮犀楊某尚書以耳聾致政居鄆縣別業  
同里高氏有二子小字大馬小馬一日里中社  
小馬攜酒就楊公曰此社酒可治聾願得侍杯  
杓之餘瀝取牋書與之云云

王晉卿客

續嘯春鶯詩

幾年流落向天涯萬里歸來兩鬢華  
翠袖香殘空浥淚  
青樓雲渺定誰家  
佳人已屬沙吒利  
義士今無古押衙  
回首音塵兩沈絕  
春鶯休嘯沁園花



西清詩話王晉卿貶均州姬侍盡逐有一歌者  
號嘲春鶯色藝兩絕不知流落何許後三年內  
徙汝陰道過許昌市旁小樓聞泣聲晉卿問乃  
轉春鶯也恨不可復得因賦佳人已屬沙吒利  
一聯客有足成章云云

## 太學生

### 續徽宗詩

選飯朝來不喜餐  
御廚空費八珍盤  
人間有味都嘗遍  
只許江梅一點酸

陳郁話腴徽廟一日幸來夫人閣偶灑翰于小  
白團扇書七言十四字而天思稍倦顧在側璫

曰汝有能吟之客可令續之乃薦鄰里太學生  
卽宣入內侍省恭讀宸製不知指意乞為取旨  
或續句呈或就書扇左上曰朝來不喜餐必惡  
阻也當以此為詞以續于扇續進上大喜會將  
策士生于未奏名徑使造庭賜以第焉

鄭州書生

絕句

照影空濛山色裏背人撲瀉水禽飛  
梅花落盡春寒在  
細雨斜風點客衣

夷堅志云政和中兵部侍郎王家坐降天神誣  
罔伏誅初竄好延道流說丹竈神仙事兄寬守

鄭州宋往省鄭有書生能詩慕宋名行卷來謁  
內有詩云云宋大稱賞即與定交書生能招紫  
姑神每下時與人音容相接攜之至京師習其  
術十得七八外間宣傳浸淫達于中禁時林靈  
素方得志朝士多欲宋親幸以傾林吏部尚書  
劉曷譽薦尤至有旨賜對內殿徽宗為之前席  
約某日即禁宇邀天神林遣人通意欲與共功  
宋拒之林忿且懼或為言王侍郎何所能特出  
於鄭州一秀才耳林因請問言于上謂宋父昔  
在西邊嘗與夏人有密約叛國既而未成宋將  
嗣其謀為令刺客變服為道士伺車駕焚香候  
神時將肆不軌初無上真降格之事上疑焉及  
某日宋與書生詣東華林先語閤卒止生于外  
拘係之獨宋得入左右供役皆小黃門宋知墮  
林計而無策可脫閱三晝夜寂無影響乃執宋  
并書生付極刑

成郎中

舉蒙詩

一牀兩好世間無  
好女如何得好夫  
高捲珠簾明點燭  
試教菩薩看麻胡

高齋漫錄毘陵成郎中宣和中為省官貌不揚  
而多髭再娶之夕岳母陋之曰我女如菩薩乃  
嫁一麻胡命成作舉蒙詩成乃操筆大書云云

賈舍人

題壁

愁見干戈起四溟恨無才術濟生靈不如痛飲中山酒  
直到太平方始醒

陶朱新錄靖康間有賈舍人者甚儒雅無金帛  
子女之蓄嘗題一絕于壁云

范姓

題黃姑織女祠

高颺初至月埋輪烏鵲橋邊綽約身聞道佳期唯一夕

因何朝暮對斯人

中吳紀聞崑山縣東三十里地名黃姑古老相  
傳云常有織女牽牛星降于此地織女以金匳

劃河水涌溢牽牛因不得渡今廟之西有水名  
百沸河鄉人異之為之立祠祠中列二像建炎  
兵火時士大夫多避地東岡有范姓者經從祠  
下題壁間云云鄉人遂去牽牛像今獨織女存  
焉每至七夕人皆合錢為青苗會所收之多寡  
持杯玳問之無毫釐不驗

劉君

劉君失名周少隱嘗從學為詩

路中遇雪

四野同雲漫不收停驂一望思悠悠  
乍踈還密如人事易聚難消似客愁  
倍費橐金歸酒釀苦添風色上征裘

驛亭今夕定無寐  
淅瀝寒聲未肯休

庚溪詩話

沈某

臞菴

清江繞檻白鷗飛  
坐看潮痕上釣磯  
松菊未荒元亮徑  
芰荷先製屈平衣  
窗前楓葉曉初落  
亭下鱸魚秋正肥  
安得從君理蓑笠  
櫂歌相趁入烟霏

吳郡志

余知閣

絕句三首

幾年魂繞浙城西十里荷花漾錦陂  
踏徧兩峯三竺路又隨青嶂入雲棲

洛邑名園歌舞沈亂鴉啼破幾深林  
何人學得香山老千載精廬有梵音

千里旌旗擁六飛投簪欲上釣魚磯  
無端忽被閒雲引迴耀峯前掩竹扉

雲棲寺志寺近掘地得斷碑題曰宋隨龍余知  
閣宅界旁有石隱隱有詩蓋護蹕南來因家于此  
後捨宅為寺也



東都故老

客臨安懷舊都

曾見宜秋輦路門大書黃榜許游行漢家寬大風流在  
老去西湖樂太平

清波雜誌歲自元宵後都人即辦上池遨遊之  
盛惟恐負于春色當二月末宜秋門下揭黃榜  
云三月一日三省同奉聖旨開金明池許士庶  
游行御史臺不得彈奏迨南渡故老客臨安泛  
西湖懷舊都作詩云輝向見人每舉此詩因  
志于此以補夢華之遺

東京夢華錄三月一日州西順天門外開金明  
池瓊林苑每日教習車駕上池儀範雖禁從士

庶許縱賞御史臺有榜不得彈劾池在順天門街北周圍約九里三十步池西直徑七里許入池門內南岸西去百餘步有西北臨水殿車駕臨幸觀爭標錫宴于此往日旋以絲幄政和間用土木工造成矣又西去數百步乃仙橋南北約數百步橋面三虹朱漆欄楯下排雁柱中央隆起謂之駞駞虹若飛虹之狀橋盡處五殿正池之中心四岸石甃向背大殿中坐各設御幄不禁游入殿上下回廊皆開撲錢物飲食伎藝人作場句肆羅列左右遊人還往荷蓋相望橋之南立樞星門門裏對立綠樓每爭標作樂列妓女于其上門相對街南有甃石甃砌高臺上有樓觀廣百丈許曰寶津樓樓前至池門闊百餘丈下瞰仙橋水殿車駕臨幸觀騎射百戲于此

錢唐士人

寄友

江漲橋邊花發時故人曾共著征衣  
請君莫唱橋南曲  
花已飄零人不歸

酬友

認得吳家心字香  
玉窗春夢紫羅囊  
餘薰未歇人何許  
洗破征衣更斷腸

能改齋漫錄近有士人嘗于錢唐江漲橋為狹  
邪之游後朝廷復收河南士人陷而不返其友

作詩寄之且附以龍涎香士人在河南得詩酬之

太學士人

絕句

萬鴿飛翔繞帝都朝昏收放費工夫何如養取雲邊雁  
沙漠能傳二聖書

古杭雜記詩集高宗紹興間宮中養飛鴿每日  
羣飛于外太學士人作詩以諷其詩流入大內  
高宗惻然自是宮中不復畜鴿

錢塘軍人

弄潮詩

弄罷江潮晚入城  
紅旗颭颭白旗輕  
不因會喫翻頭浪  
爭得天街鼓樂迎

夢梁錄八月潮怒勝于常時十八日帥座出郊  
教習水軍杭人有無賴之徒以大綠旗小青涼  
傘紅綠小傘兒各繫色繡段子滿竿伺潮出海  
門百十為羣執旗洒水以逐子胥向有前輩作  
詩云云

左君

題秦檜賜宅

格天閣在人何在偃月堂深恨亦深不見洛陽圖白髮  
但知郿塢積黃金直言動便遭羅織舉目寧知有照臨  
炙手附炎俱不見可憐泥滓滿牆陰

容齋三筆云左君天台士人頗有才最善謔居  
西湖上好事請謁人或畏其口後竟終于布衣

淳熙太學生

誚陳賈

周公大聖猶遭謗伊洛名賢亦被譏堪歎古今兩陳賈  
如何專把聖賢非

李心傳道命錄淳熙十五年監察御史陳賈論  
道學欺世盜名乞加擯斥時太學諸生為之語  
云云

### 洞庭漁父

#### 絕句

八十滄州一老翁  
蘆花江上水連空  
世間多少乘除事  
良夜月明收釣筒

夷堅志卓彥恭嘗過洞庭月下有小漁舟過其  
旁卓呼問有魚否應曰無魚有詩卓喜曰願聞  
一篇可乎其人鼓枻高吟曰

常省元

書園契上趙尚書

乾坤到處是吾亭  
機械從來未必真  
覆雨翻雲成底事  
清風明月冷看人  
蘭亭契事今非晉  
桃洞神仙也笑秦  
園是主人身是客  
問君還有幾年身

夷堅志江西趙尚書宅與常省元相接百計取之而不可得一日常作一詩書契送之云云趙得詩不敢受券卽日還之

化州郡守



化州

羅川帶郭古南州  
陵水環城小庾樓  
雲淡青林無過雁  
雨晴丹荔集鳴鳩  
叨榮銅竹三經夏  
勸課農桑屢有秋  
好趁湍流下吳會  
章臺無柳繫歸舟

方輿勝覽

高安太守

判幸元龍求免役詩後

松垣筆力破滄溟  
欲援任濤免稅丁  
一段風流好公案  
錦江重寫入圖經

豫章詩話任濟筠州人唐咸通中進士與鄭谷俱稱十哲常侍李鵬見其詩有露圍沙鶴起人臥釣船流之句特與免役鄉民訟之鵬判云江西界內有詩似濟者並與免役宋高安幸元龍字震甫號松垣嘉泰間進士有氣節以詩援任濟例求免稅丁太守判云云震甫道判鄂州上書雪濟卹冤屏廢而卒

開禧朝士

獻韓平原生日

本是神仙服日華而今癯瘁為王家槐龍影轉朝方退

閒却南園一院花

後村詩話

開禧宗子

題客邸

策蹇衝風怯曉寒也隨舉子到長安  
路人莫作親王看  
姓趙如今不似韓

西湖志餘佗曹當軸黜陟朝紳權移人主時有  
天族就試南宮者題詩客邸云云

開禧牧童

歌

朝出耕田暮飯牛  
林泉風月共悠悠  
九重雖竊阿衡貴

爭得功名到白頭

昨非巷日纂侂曹過南園山莊趙師霽偕行至  
東郊別墅宛然鄉井見林薄中一牧童歌云云  
趙呵曰平章在此誰敢唐突跡牧童至草廬屏  
上有詩云玉津園內行天討怨血空啼杜宇紅  
後韓為史誅于玉津園

韓院判

詠迎春黃胖

腳踏虛空手弄春一人頭上兩安身忽然綫斷兒童手  
骨肉都為陌上塵

龐元英談藪韓侂冑暮年以冬月攜家游西湖  
畫船花輿徧覽南北二山之勝未乃宴于南園  
族子院判與馬席間有獻牽絲傀儡為土偶負  
小兒者名為迎春黃胖韓顧族子汝名能詩可  
詠之即承命作絕句云云韓大不樂不終宴而  
歸未幾禍作

### 齋舍生

### 題韓侂冑甲第

掀天聲勢祗冰山  
廣廈空餘十萬間  
若使早知明哲計  
肯將富貴博清閒

花柳依然弄晚風  
才郎袖手去無蹤  
不知郿塢金多少

爭似盧門席不重

白獺髓韓侂冑平原甲第即瑞石北阜為第開  
禧末罪逐後改為寺監齋舍生有題二絕于壁  
云云

嘉定太學生

題三賢堂

和靖東坡白樂天幾年秋菊薦寒泉如今往事都休問  
且為官司趁酒錢

鶴林玉露嘉定時于西湖三賢堂賣酒太學生  
題詩府尹聞之愧而止

邦俊

失其姓

題王司理持平堂

淑問皋陶晞在泮奉公不撓幕中參仰思弼教刑明五  
深念求情法以三虞詡為卿宜有自于公比德蓋無慙  
囿空草茂庭柯綠行詠甘棠踵召南

詩律武庫

適安散人

題趙千里夜潮圖

寂寞江頭夜風急怒濤捲起千堆雪一輪兔魄騰巨光

激起金蚪高萬尺沙頭宿雁理羽衣忽聞潮聲不知歸  
縱橫亂影向天末一點破秋光飛誰人輕用造化筆  
寫出此景不遺一眼明絹素見天巧長江大海來小室  
靜對真成聽潮聲我亦詩腸如雷鳴捲卷不知身所在  
猶覺眼底風濤生

式古堂畫考明禁進昇云趙千里夜潮圖卷末  
多宋嘉定人題詠皆不著姓名

名山樵子

題趙千里夜潮圖

款書嘉定三禩首夏望後三日



八月錢塘江上水風靜波平清澈底夜半潮聲帶月來  
沙頭眠雁還驚起何人一幅鵝溪絹畫出長江千萬里  
莫道波聲靜不聞請君默坐聊傾耳

式古堂畫考

### 太學生

### 送袁侍郎

天眷頻年惜挂冠誰令今日遠長安舉幡莫遂諸生願  
祖帳應多行路難去草豈知因害稼彈烏何事却驚鸞  
韓非老子還同傳憑仗時人品藻看

白獺髓嘉定間金人交攻廷臣有以和戰守三策為言者是時胡桎侍郎專主和議四明袁燮侍郎與胡公廷爭專主戰守仍以笏擊胡公額遂下侍從臺諫集議後袁君以此辭歸太學諸生作詩以送之

樞

曰璫按負暄野錄二卷嘉定中名樞者所著失其姓元大德三年茅雲山鈔本

賦孫生春膏紙

膏潤滋松雨孤高表竹君夜碁寒擣玉春几瑩鋪雲越地雖呈瑞吳天乃策勳莫言名晚出端可大斯文

負暄野錄吳人取越竹以梅天水淋漓令稍乾反覆碁之使浮茸去盡筋骨瑩徹是為春膏其

色如蠟其光可鑑故吳箋近出遂與蜀產抗衡  
吳門孫生造春膏紙尤造其妙余嘗賦詩云云

### 太學蘊道齋生

#### 絕句

朝來池上有新事火急報教同舍知昨夜雨餘春水滿  
白鷗飛下立多時

鶴林玉露太學蘊道齋有小池忽一鷗飛來容  
與甚久一同舍生題詩云云讀者賞其蘊藉

#### 朝士

### 和徐淵子九日

呼兒為我整烏紗不是無心學孟嘉要摘金英滿頭插

明朝還是過時花

鶴林玉露

川官

題都下僦樓

朝看貝葉牢籠佛夜禮星辰取奉天呼召歸來聞好語  
初三初四亦欣然

貴耳集一川官在都乞差遣留三四年題一詩  
在僦樓之壁初三初四二僕也因此詩傳播京  
下遂得缺而去

北來人

題襄陽光孝寺壁

干戈未定欲何之一事無成兩鬢絲蹤跡大綱王粲傳  
情懷小樣杜陵詩脊令信斷雲千里烏鵲驚飛月一枝  
安得中山千日酒陶然直到太平時

貴耳集辛卯歲北來人數百輩暫寓于襄陽府  
光孝寺有一人題詩于壁云云

太學生

刺賈似道

昨夜江頭長碧波滿船都載相公嗟雖然要作調羹用  
未必調羹用許多

西湖志餘似道令人販鹽百艘至臨安賣之太  
學生有詩

仙村人

月泉第四名

春日田園雜興

芳草東郊外疎籬野老家平疇一尺水小圃百般花青  
箬閒耕雨紅裙鬪采茶村村寒食近插柳徧檐牙

原評領聯十字一毫不費力自與黏泥體者不  
同餘見雜興

東湖散人

月泉第四十三名

同上

物色天成畫不如東風又到野人廬  
蜜蠶辛苦供常課  
科斗縱橫學古書  
小雨杏花村問酒  
淡烟楊柳巷巾車  
汀洲水暖蘆芽長  
更買扁舟伴老漁

原評前聯得詠物之工後聯句法亦好末見雜興

感興吟桐江

月泉第四十八名

同上

兒結蓑衣婦浣紗暖風疎雨趙桑麻金桃接種連花藥  
紫竹移根帶筍芽椎鼓踏歌朝祭社賣薪挑菜晚回家  
前村犬吠無他事不是搜鹽定權茶

原評此詩無一字不佳末語雖似過直若使衆  
詩觀風亦足以戒聞者

九仙人寓杭

月泉第五十五名

同上

軒裳一夢斷塵寰桑柘陰陰靜掩關種秫已非彭澤縣  
采薇何必首陽山因憐社鼓剛催老轉覺儒冠不負閒



君看浣花堂上燕芹泥雖好亦知還

原評前聯就事映帶田園次聯韻度迴別末尤有趣

桑柘區金華

月泉第五十六名

同上

粟爵瓜官嬾覬生涯雲水與烟腴晚風一笛麥秧隴  
春雨半鋤桑柘區可是樊遲宜請學肯教陶亮歎將蕪  
斜陽芳草關情處更把新詩弔石湖

原評起四字絕佳二聯分明見田園惜尾句弔字太過

柳州

月泉社中人第五十七名

同上

東風生意鬧農圃正宜勤稻種開包曬苗衣譜畝分疇  
西曉耕雨舍北暮鋤雲莫待荒三徑歸與陶令君

原評二聯見田園分明第四句最好曬字欠工

草堂後人古杭

月泉第五十八名

同上

桑眼已開芳晝長西疇東墅足相羊麥風初暖燕爭壘

林雨初晴蛙滿塘  
野老新衣逢社喜  
山妻椎髻為蠶忙  
紛紛遊騎看花去  
誰識吾家舊草堂

原評第二句入田園快便前聯絕好後半篇意順

君瑞桐江

月泉第五十九名

同上

白粉牆頭紅杏花  
竹槍籬下種絲瓜  
廚烟乍熟抽心菜  
篝火新乾捲葉茶  
草地雨長應易墾  
秧田水足不須車  
白頭翁嫗閒無事  
對坐花陰到日斜

原評此真雜興詩起頭便見作手

青山白雲人居杭

月泉第六十名

同上

昨夜東風雨一犁曉晴鄰巷共熙熙遮門賸喜有桑柘  
輸國不憂無繭絲小婦餉耕因廢織老夫觀社忽成詩  
眼前物物是生意却恨淵明歸計遲

原評領聯語意深頸聯尤雋 以上月泉吟社

番陽布衣

書中山驛壁

回頭四十五年非無賴秋光滿客衣可惜吳中蓴菜好  
陸機張翰不同歸

谷音云番陽布衣有書中山驛壁云回首萬里  
歲晚何言云云番陽布衣題

瀟湘漁父

絕句

高枕形骸外空江何限情落葉不成調半夜起秋聲

谷音云崔瑒晚泊湘江淡烟微月有客歌而過  
之追問居與名置其釣竿長嘯而去

閩清野人

絕句

偶與雲水會不與雲水同雲散水流去杳然天地空

谷音云僧惠了行閩清谷中三日到一空舍稍憩有一人荷鋤來便向壁熟睡僧既尋路還他日再往已焚其舍惟斫樹白而書之

嘲王隨

以下俱無姓名

誰謂調元地翻成養病坊但見僧盈室寧憂火掩房

江鄰幾雜志王隨作相病已甚好釋氏時有獻嘲者云

題公館壁

猛風拔大樹其樹根已露上有寄生草青青猶未寤

法藏

碎金

丁晉公清真香歌

四兩元參二兩松麝香半分蜜和同丸如茱子金爐爇  
還似千花噴曉風

河南陳氏香譜

題關西驛舍

孤星熒熒照寒野漢馬蕭蕭五陵下廟堂不肯用奇謀

天子徒勞聘賢者萬里危機入燕薊八方殺氣衝靈夏  
逢時還似不逢時已矣吾生真苟且

中山詩話景祐中羌人叛詔遺士獻方畧率皆  
得官或題云云

景祐中添張祐詩

天章故國三千里學士深宮二十年殿院一聲河滿子  
龍圖雙淚落君前

涑水紀聞景祐四年鎮廬人最盛開封府投牒  
者至數百人國子監及諸州者不在焉是時陳  
堯佐為宰相韓億為樞密副使既而解榜出堯  
佐子博古為解元億子孫四人皆無落者衆作



河滿子以嘲之先是天章閣待制范仲淹坐言事左遷饒州王官待制王宗道因奏事自陳為王府官二十年不遷詔改龍圖閣學士權三司使王博文言于上曰臣老且死不復得望兩府之門因涕下上憐之數日遂為樞密副使當時輕薄者取張祐詩益其文以嘲之

### 題麻姑壇記

五百年來別恨多東征重得見青蛾  
擘麟方擬窮懽喜  
不奈閒人背癢何

隱居詩話云皇祐中江西有一事與蔡經事正類或題麻姑壇記以嘲之

### 獻韓魏公

是非莫問門前路得失須憑塞上翁  
引取碧油紅旆去  
鄴王臺畔醉春風

幕府燕閒錄韓魏公初罷相出鎮長安或獻詩云云即請守相州

石刻詩

雨滴空階曉無心換夕香  
井桐花落盡一半在銀牀

許彥周詩話嘉祐中河濱漁者網得小石石上刻一小詩不知誰作

嘲同州

三春花發惟樗樹二月鶯啼是老鴉

江鄰幾雜志

和蔡君謨題壁韻

長垂玉筍殘妝臉肯為金釵露指尖  
萬斛閒愁何日盡  
一分真態更難添

郁氏書畫題跋記東坡云僕在錢唐一日謁陳述古邀余飲堂前小閣中壁上小書一絕君謨真迹也又有人和云云二詩皆可觀後詩不知誰作也

贈日本僧寂照禮天台山

滄波泛瓶錫幾月到天朝  
鄉信日邊斷歸程海面遙  
秋泉吟裏落霜葉定中飄  
為愛華風住扶桑夢自消

王氏談錄

題寢宮詩

農桑不擾歲常登邊將無功吏不能四十二年如夢過  
東風吹淚灑昭陵

復齋漫錄此詩題于寢宮不著姓名宜表而出之

村舍題壁詩

人間無漏仙兀兀三杯醉世上無眼禪昏昏一枕睡雖  
然沒交涉其奈畧相似相似尚如此何況真箇是

苕溪漁隱叢話東坡云余官鳳翔見村邸壁上書數句余愛而誦之

絕句

訓釋詩書日月明紛紛法令下朝廷不知心本緣何事  
苦勸君王用肉刑

每愧先生道絕倫古來歸美是忠臣門人李漢真堪罪  
何用垂編示後人

侯鯖錄介甫熙寧初首被選擢得君之專前古  
未有罷政歸金陵作日錄七十卷前朝舊德大  
臣及當時名士不附已者詆毀至無一完人者  
其間論法度有不利于民者皆歸于上可以垂  
耀于後世者悉已有之故建中靖國之初諫官  
陳瓘極力論其壻蔡卞之惡曰安石臨終戒其

家焚之悔其作也卞留之至紹聖間作尚書右丞盡編之裕陵國史中遂行之瓘所謂遵私史而壓宗局是也士大夫忠憤者有詩云

句

細草行滕路垂楊席帽風

明道雜誌

嘲張師雄

昨夜陰山賊吼風帳中驚起蜜翁翁  
平明不待全師出  
連著皮裘入土空

隱居詩話昨夜陰山吼賊風帳中驚起紫鬚翁  
平明不待全師出連把金鞭打鐵驄不知何人

之詩頗為邊人傳誦有張師雄者居洛中好以  
甘言悅人晚年尤甚洛人目為蜜翁翁會官於  
塞外一夕傳敵騎犯邊師雄倉惶震恐衣裘  
兩重伏于土穴中秦人呼土窟為土空無名子  
因改前詩以嘲之云

### 士人詩

西出潼關客路迷一葫蘆酒一篇詩葫蘆酒盡興未盡

坐看春山春盡時

范元實詩眼

### 題相國寺壁

終歲荒蕪湖浦焦貧女戴笠落柘條阿儂去家京洛遙

驚心寇盜來攻剽

楓窗小牘荆公柄國時有人題詩寺壁人皆以  
為夫出憂荒亂也及荆公罷相子瞻召還諸公  
飲蘇寺中以此詩問之蘇曰于貧女句可以得  
其人矣終歲十二月也十二月為青字荒蕪田  
有草也草田為苗字湖浦焦水去也水旁去為  
法字女戴笠為安字柘落木條剝石字阿儂是  
吳言合吳言為誤字去家京洛為國寇盜為賊  
民蓋言青苗法安石誤國賊民也

題扇上畫小兒迷藏

誰翦輕紈織巧絲  
春深庭院作兒嬉  
路郎有意嘲輕脫  
只有迷藏不入詩



過庭錄無名子從魯直學大進題扇云云蓋路德延小兒詩不及迷藏也

### 嘲王禹玉丞相

太師因被子孫煎身後無名只有錢  
喏喏佞翻王介甫  
奇奇歆殺宋昭宣  
嘗言井口難為戲  
獨坐中書不記年  
東府自來無土地  
便應正授不須權

王直方詩話王禹玉丞相既亡有無名子作詩嘲之云云其家經府指言張山人作府中追張山人至曰你怎生作詩嘲他大臣張曰某自來多作六十七字詩著題詩某吟不得府尹笑而遣之

回文四首

紅窗小立低聲怨  
永日春寒斗帳空  
中酒落花飛絮亂  
曉鶯啼破夢惺惺

同誰更倚閒窗繡  
落日紅扉小院深  
東復西流分水嶺  
恨兼愁續斷弦琴

寒信風飄霜葉黃  
冷燈殘月照空牀  
看君寄憶回文錦  
字字縈愁寫斷腸

前堂畫燭殘凝淚  
半夜清香舊惹衾  
烟鎖竹枝寒宿鳥

水沈天色霽橫參

苔溪漁隱叢話

回文三首

春晚落花餘碧草  
夜涼低月半枯桐  
人隨遠雁邊城暮  
雨映疎簾繡閣空

紅手素絲千字錦  
故人新曲九迴腸  
風吹絮雪愁縈骨  
淚灑縑書恨見郎

羞看一首回文錦  
錦似文君別恨深  
頭白自吟悲賦客  
斷腸愁是斷弦琴

茗溪漁隱叢話東坡後集有題織錦圖上回文三首淮海集載東坡跋云余少時見一江南本其後有人題詩十餘首皆奇絕今記其三首然則此詩非東坡所作也少游又云子瞻記江南所題詩本不全嘗見之記其五絕今以補子瞻之遺即叢話前集所載回文詩五首是也世以爲少游所作亦非也

### 黃山

三十六峯高倚天  
瑤臺金闕貯神仙  
嵩陽若與黃山比  
猶少靈砂一道泉

茗溪漁隱叢話圖經載黃山舊名黟山東峯下有硃砂湯泉熱可點茗春時即色微紅昔人詩

云

宣聖墓

靈光殿古生秋草曲阜城荒噪晚鴉惟有孔林殘照裏  
至今猶屬仲尼家

山東通志

臨江驛舍二詩

李白當年謫夜郎中原不復漢文章納官贖罪何人在  
壯士悲歌淚兩行

晉公功業冠皇唐吏部文章日月光千載斷碑人膾炙

不知世有段文昌

侯鯖錄紹聖中貶東坡毀上清宮碑令蔡京別撰有人過驛題二詩不書姓名

沿流館中詩

簾卷窗穿戶不扃  
隙塵風葉亂縱橫  
幽人睡足誰呼覺  
敲枕牀前有月明

東坡跋云紹聖中有人得此詩于沿流館中不知何人詩也今錄之以益篋笥之藏

宮詞二首

迎春燕子尾纖纖  
拂柳穿花掠翠簷  
聞道藥宮三十六

美人爭為捲珠簾

蓬萊風促水紋斑月發風廊數百間雲外蹕聲穿嶺去

行宮簇馬望驪山

西清詩話

崇寧中題廣陵驛木槿花

朝炊不及黔暮車不生角故應庭下花無人見開落

風月

堂詩話

戲題林靈素畫像

當日先生在市廛世人那識是真仙只因學得飛昇後

雞犬相隨也上天

竹坡詩話道士林靈素以方術顯于時有附之而得美官者頗多至今有驕色或作詩云云

政和癸巳刻石詩

萬里區區學宦游江南江北幾時休朝來作別殷勤語

為謝多情黃栗留

金陵祈澤山志

題宗室存道畫鴛鴦浦澈圖

睡足鴛鴦各欲飛水花敲岸兩三枝多情公子因乘興

寫出江春日暖時



宣和畫譜宗室仲憫字存道長于宮邸不以塵俗累其意雅好繪畫雖寒暑不捨每歲都城士大夫有園圖者花開時必縱人游觀仲憫或載酒行樂初無綠飾汎然于遊人中以筆麈粉墨自隨偶遇興來見高屏素壁隨意作畫或求則未必應也嘗于華陽郡主王憲家林亭間作鴛鴦浦淑頃刻而就至于設色唯輕淡點綴而已觀者無不賞激有人題詩云云

### 題太行山石壁

太行千里連芳草獨酌一杯天地小醉臥花間人不知

黃鶯啼破春山曉

陶朱新錄

### 題嵩山峻極中院法堂壁

一團茅草亂蓬蓬  
驀地燒天驀地空  
爭似滿爐煨榾榮  
慢騰騰地熱烘烘

許彥周詩話宣和癸卯僕遊嵩山峻極中院法  
堂後簷壁間有詩云云其傍隸書四字云勿毀  
此詩寺僧指示曰此四字司馬相公親書也

靖康初洛陽城陷作

藝祖憲章誰口道  
迎門戶戶有人開  
清晨山後九州沒  
日落河頭萬騎來  
地近蓬蒿堆白骨  
巷無人跡長蒼苔  
可憐司馬碑猶臥  
誰念伊公一笛哀

三朝北盟會編

題汴京天清寺壁

靖康間

空餘綠綺琴，嬾把新聲寫。不見臨邛人，誰是知音者。

庚溪

詩話

題台州金鰲峯祥符寺壁

黃帽當年駕舳艫，東浮鯨海出三吳。中興事業風波惡，好作君王坐右圖。

雲麓漫抄：高宗建炎三年十二月，航海東來，曾幸此寺，御坐一竹椅。寺僧今別造以黃蒙之，有人題壁云云。

紹興丁丑詩

何處難忘酒南宮放榜時有才如杜牧無勢似章持不  
取通經士先收執政兒此時無一盞何以展愁眉

清波雜志紹興丁丑章持魁南省時有詩

嘲朱希真

少室山人久挂冠不知何事到長安如今縱插梅花醉  
未必王侯著眼看

二老堂詩話朱希真洛陽人以浙東提刑致仕  
居嘉禾秦丞相欲令希真教秦伯陽作詩遂落

致仕除鴻臚少卿蓋久廢之官也或作詩云云  
蓋希真舊有鷗鴒天云自是清都山水郎天教  
懶慢帶疎狂曾批給露支風敕累奏留雲借月  
章詩萬首醉千場幾曾著眼看侯王玉樓金闕  
慵歸去且插梅花醉幾場故以此譏之

### 題關中驛壁

鼙鼓轟轟聲徹天中原廬井半蕭然鶯花不管興亡事  
妝點春光似昔年

庚溪詩話紹興庚申辛酉河南關陝之地暫復  
有自關中驛舍見題二絕云云

### 題劉武僖題名後

一入侯門海樣深  
漫留名字惱行人  
夜來髣髴高唐夢  
猶恐行人意未真

清波雜志劉武僊自柯山赴召記歲月于仰高亭上末云侍兒意真代書後有人題云云

題崇安分水驛壁

江南三月已聞蟬  
麥熟梅黃繭作綿  
料得故園烟雨裏  
輕寒猶作勒花天

庚溪詩話

句

一色樓臺三十里  
就中何處覓孤山

南渡題西湖波離志

清

題嚴陵釣臺

范蠡忘名載西子介推逃蹟累山樊先生政爾無多事

聊把漁竿坐水村

庚溪詩話

題陽羨溪亭壁

碧雲亭上碧雲飛竟日迴環面翠微梅萼破香知臘盡

柳梢含綠認春歸風前古澗琴三疊雪後群峯玉一圍

遙想上人清太甚水精宮裏說禪機

庚溪詩話

題溧陽郵亭壁

十年棄微官歸來事却埽扁舟訪安期要覓如瓜棗不  
知膏粱珍惡食亦自好田園苦無多生理但草草濁酒  
時一尊孤斟從醉倒

庚溪詩話

句

大柄如歸手蝨蝨莫浪飛

嚴陵士人詠扇句

庚溪詩

句

行滿三千我四千功成八百我九百

庚溪詩話陳桷待制紹興中嘗從諸大將為謀  
議官頗好修養之方且自以為得道嘗題其所



居曰神仙多是大羅客我比大羅超一格有輕薄續其後云

寒亭

在荊州玉泉山

朔風凜凜雪漫漫未是寒亭分外寒六月火雲天不雨  
請君來此凭闌干

方輿勝覽

上太師公相四首

并序

某頓首百拜上啟切以道欲興周嵩岳遂生于申伯  
運將啟漢昴星爰降於鄴侯眷我聖朝起茲人傑偶  
垂弧之盛旦屬偃革之昌期天祐賢生時為國賀恭

惟太師公相明堂一柱滄海六鰲儲二水之英姿稟  
三山之秀氣抗義不屈同杵臼之立孤仗節言旋邁  
子卿之出使大講一時之利爰交二國之歡反隗馭  
於慈寧天顏有喜收太阿於密宥兵柄難搖興禮樂  
而牖俗于中和設庠序而域民於禮義是宜集開國  
承家之統口加地進律之恩錫甲第以安居駐屬車  
之臨幸凡茲偉觀足為美談某舊出陶鎔遠瞻牆仞  
攀鱗附驥際休運之半千滌硯薰毫頌大功之數十

仰祈椿算愧瀆鈞嚴某下情無任悚懼之至詩曰

地靈人傑產忠良瑞靄龍蟠虎踞鄉天欲中興神降岳  
世將嘉靖弼生商和羹早報梅花信壽酒先飛柏葉觴  
笑指山南成帶礪眉與國等綿長

交歡鄰國獨推誠不顧流言斷必行直欲生靈躋壽域  
聊將干舞解平城坐扶國祚齊箕翼立挽天河洗甲兵  
和議一成夷夏福蒼生擊壤永昇平

談笑能令國勢彊一時忠義凜秋霜挽回隗馭臨長樂

直把鴻勳紀太常問寢東朝宮殿曉來庭北使塞垣長  
輔成孝悌光寰宇竹帛仍傳萬世芳

手扶日月補圓穹錫第庸旌再造功樂奏鈞天迎騎擁  
詩歌湛露宴堂豐屬車臨幸龍顏喜拔宅飛昇帝眷隆  
燕雀非惟依托計華夷億兆賴帡幪

播芳大全

舒州下寨驛中詩

北堂無老信來稀十載秋風雁自飛今日滿頭生白髮  
千山鄉路為誰歸

侯鯖錄王性之云余以永感之人讀之垂涕

### 題驛壁

記得離家日尊親囑付言逢橋須下馬過渡莫爭船雨  
宿宜防夜雞鳴更相天若能依此語行路免迍邐

侯鯖錄宗希鵬舉言見一驛壁上有詩云云此  
征途藥石也余愛之每以示子孫

### 陶公醉石

五字高吟酒一瓢廬山千古想風標至今門外青青柳

不為東風肯折腰

周必大廬山後錄

句

啼月杜鵑喉舌冷宿花蝴蝶夢魂香

優古堂詩話黃季濬嘗言一士人詩云云

油污衣

一點清油污白衣斑斑駁駁使人疑縱饒洗徧千江水  
爭似當初不污時

客齋三筆予甫十歲時過衢州白沙渡見岸上  
酒店敗壁間有題詩兩絕其名曰犬落水油污  
衣犬詩太俗不足傳獨後一篇殊有理致是時  
甚愛其語今六十餘年尚歷歷不忘

嘲京仲遠

一在廬陵一豫章  
文忠文穆兩相望  
大家飛上梧桐樹  
自有旁人說短長

四朝聞見錄歐陽子諡文忠京丞相鏜以善事  
韓平原亦諡文忠後以公論謂不宜以諡歐陽  
者諡鏜改文穆無名子作詩云云

嘲趙師異詩

堪笑明廷鷄鷺甘  
作村莊犬雞一  
旦冰山失勢湯燖獲  
煮刀割

古杭雜記詩集韓侂胄作南園于吳山有所謂  
村莊者竹籬茅舍宛然田家氣象侂胄游其間  
甚喜曰狀得絕似但欠雞鳴犬吠耳既出忽聞  
莊中雞犬聲令人視之則府尹趙師巽也時有  
詩云云

感開禧事

自古和戎有大權未聞函首可安邊  
生靈肝腦空塗地祖父魂讎共戴天  
晁錯已誅終叛漢於期未遣尚存燕  
廟堂自謂萬全策却恐防胡未必然

齊東野語開禧北伐侂胄既誅王栴葉時請通  
謝于金匱侂胄首以往識者殊不謂然有為詩



云云

題壁

白塔橋邊賣地經長亭短驛甚分明如何祇說臨安路  
不較中原有幾程

古杭雜記驛路有白塔橋印賣朝京里程圖士大夫往臨安必買以披閱有人題壁云云

題太和樓壁

太和酒樓三百間大槽晝夜聲潺潺千夫承糟萬夫甕  
有酒如海糟如山銅鍋鎔盡龍山雪金波湧出西湖月

星宮瓊漿天下無九醞仙方誰漏泄皇都春色滿錢塘  
蘇小當壚酒倍香席分珠履三千客後列金釵十二行  
一座行觴歌一曲樓東聲斷樓西續就中茜袖擁紅牙  
春蔥不露人如玉今年和氣光華夷遊人不醉終不歸  
金貂玉塵寧論價對月逢花能幾時有箇酒仙人不識  
幅巾大袖豪無敵醉後題詩自不知但見龍蛇滿東壁

武林舊事和樂樓昇陽宮南庫和豐樓武林園  
南上庫中和樓銀甕子中庫春風樓北庫太和  
樓東庫西樓金文西庫太平樓豐樂樓南外庫  
北外庫西溪庫已上並官庫屬戶部點檢所每

庫設法官妓數十人各有金銀酒器千兩以供  
飲客登樓之用每庫有祇直者數人名曰下番  
飲客登樓則以名牌點喚侑樽謂之點花牌元  
夕諸妓皆併番互移他庫夜賣各戴杏花冠兒  
危坐花架然名倡皆深藏窺閣未易招呼往往  
皆學舍士夫所據外人未易登也

### 歸州竹枝詞

人鮓甕頭波放顛兩岸青山青插天篙師力盡客破膽

茅屋老翁方醉眠

以上前賢小集拾遺

### 弔梅聖俞墓

贏得兒童叫夫子可憐名位只都官

娛書堂詩話梅聖俞因劉原甫戲言之識竟終于都官葬在宣城俗呼為梅夫子墓弔之者有句云云

禽言二首

剛道故鄉如許好其如遊子不歸何自從五柳先生死  
空染千山淚血多

子規

蠶蠶方成四月初鳥能早計巧相呼誰知機杼聲纔息  
已有王官來索租

著新脫故

娛書堂詩話客有誦禽言二詩句意皆工惜失姓名

興化沙溪驛題壁

沙溪祇是舊沙溪今日重來路欲迷  
獨有暮鴉知我意白雲深處盡情啼

荆溪林下偶談

釣臺

生涯千頃水雲寬舒卷乾坤一釣竿  
夢裏偶然伸隻脚

渠知天子是何官

鶴林玉露

題項羽廟

嬴秦久矣酷斯民羽入關中又火秦  
父老莫嗟遺廟毀

咸陽三月是何人

古杭雜記項羽廟在臨安近郡三衢十八里樟戴市市人失火延及斯廟人有詩云

題岳陽飛吟亭

呂仙遺蹟

覓官千里赴神京  
鍾老相傳蓋更傾  
未必無心唐事業  
金丹一粒誤先生

鶴林玉露云余酷愛其旨趣蓋夫子告沮溺之意也

書真西山生祠壁

舉世知公不愛名  
湘人苦欲置丹青  
西天又出一活佛

南極今成兩壽星  
幾百年方鍾間氣  
八千春願祝修齡  
不須更作生祠記  
四海蒼生口是銘

湖南新聞真西山帥長沙郡人為立生祠一夕  
有人大書一詩于壁間云云

### 題采石蛾眉山

一島烽烟斡怒流  
然犀捉月兩悠悠  
蛾眉中劃三千丈  
不著人間半點愁

前賢小集拾遺

### 荅陳蒙索賦梅花

影搖溪脚月猶冷  
香滿枝頭雪未乾  
只為傳家太清白

致令生子亦辛酸

蓉塘詩話宋國學正陳蒙輕財尚義家世清白  
一日有布衣持紙扇來謁上書云出韻不駐思  
蒙以酸字為韻令賦梅花輒應聲云云蒙大悅  
厚贈之

規史相

前身元是覺闍黎業障紛華總不迷到此更須睜著眼  
好將慧力運金鐙

西湖志餘史彌遠丞相浩之子鄞人也初浩與  
覺長老善問曰和尚與我孰好覺見其羅綺爛  
盈粉黛環列漫曰丞相富貴好老僧何敢比也  
既自省曰此一念差終當墮落泥滓一日浩坐



廳上見覺突入中堂茶頃報後院弄璋浩默然  
知為覺也遂以覺為小名及長名之曰彌達彌  
達當寧宗朝韓侂冑以用兵起釁彌達遂上疏  
力詆帝嘉之尋又贊廢濟王立理宗理宗德之  
寵任日劇相兩朝二十六年權震海內時人作  
詩規之云云

### 德興邑廨石刻詩二首

仕宦之身天涯海畔行商之身南州北縣不如田舍長  
拘見面門無官府身即强健麻麥徧地猪羊滿圈不知  
金貴唯聞粟賤夏新絹衣秋新米飯安穩眠睡直千直  
萬

我田我地我桑我梓只知百里不知千里我飢有糧我  
渴有水百里之官得人生死孤兒寡婦一張白紙入著  
縣門冤者有理上官不嗔民即歡欣上官不富民免辛  
苦生我父母養我明府苗稼萋萋曷東曷西父母之鄉  
天子馬蹄

游宦紀聞

淳祐中詩

合抱長材臥壑深於今惟恨不空林誰知廣廈千斤斧  
斲盡人間孝子心

癸辛雜識淳祐庚戌春創新寺于西湖之積慶山改九里松舊路輪輿極其靡麗旣而給賜貴妃閻氏為功德院且賜山園田畝建造之初內司分司分遣吏卒市木于郡縣旁緣為奸望青抹斫鞭笞追逮難犬為之不寧雖勲臣舊輔之墓皆不得而自保或作詩諷之其後恩數加隆雖御前五山亦所不逮

### 嘲鄭安晚

光範門前雪尺圍  
火雲燒蓋晚風吹  
堪嗟淳祐重來日  
不似端平初相時  
里巷誰同司馬哭  
番夷肯為孔明悲  
青山化作黃金塢  
可惜角巾歸去遲

癸辛雜識鄭清之字德源號青山又號安晚為  
穆陵舊學端平初相聲譽翕然及淳祐再相已  
髦及之政事多出其姪孫太原之手公論不與  
辛亥冬祈雪得雷電大作而清之薨于位時有  
詩云

淳祐癸丑詩

南省觀圖喪一名補闡又試萬人英兩重門闔如天險  
十有七人倒地橫誰設秦阮來貢院枉教唐士夢登瀛  
雲山萬里家何在月白風清鬼哭聲

湖海新聞宋淳祐癸丑臨安試監補者天下無  
慮數萬踈踐而死者十有七人省試亦喪一人

當時有詩云云

句

空使蜀人思董永恨無漢劍斬丁公

宋季三朝政要寶祐四年董槐罷相時丁大全為監察御史奏槐章未下先調臨安府隅兵百餘人圍其第以臺牒驅迫出之時有詩云云

題衢州驛舍

千夫荷擔在山阿膏血如何有許多不若扁舟竟歸去  
休從清獻墓前過

蓉塘詩話趙清獻公墓在衢州城東北四十五里景定間林存為潭州帥罷歸道衢調千夫荷擔經墓旁疲甚因相與語趙清獻公一琴一鶴那有許耶或聞之題詩驛舍云

江右旅邸題壁

有約未歸蠶結局小軒空度牡丹春夜來揀盡鴛鴦繭  
留織春衫寄遠人

佩韋齋輯聞

絕句

收拾乾坤一擔擔上肩容易下肩難勸君高著擎天手  
多少傍人冷眼看

古杭雜記理宗庚申賈似道初入相時有人作  
詩云云

逆旅題壁詩

山行險而修老我驂且羸獨驅六月暑躡此千仞梯世  
故不貸人牽去復挽歸茗盃參世味甘苦常相持白雲  
抱溪石令人心愧之豈無趺坐處逸固不療飢大叫天  
上人涼風為吹衣

詩人玉屑

嘲賈似道

三分天下二分亡猶把山川寸寸量縱使一丘添一畝

也應不似舊封疆

古杭雜記理宗朝嘗欲行推回田畝之令有言而未果至賈似道當國率行之有人作詩云云佩韋齋輯聞云棄淮棄蜀棄荆襄却把江南寸寸量量得畝頭多一尺尺頭能有幾多長與此小異

詠蜨

缺七字

一叢浮動戲蘭芽裁成碧玉搔頭樣畫作黃金便面花閒過樓臺飛盡日又因風雨宿誰家兒童愛把檐褕撲驚起雙雙貼絳霞



深雪偶談余曩憩吳山偶吳僧舉似四韻歲久忘其首句亦忘為誰氏所作

### 刺賈似道

厚我藩垣長彼貪不然銜壁小邦男廟堂從諫真如轉  
竟用先生策第三

錢塘遺事咸淳間汪紫原立信于襄危之際以書抵賈相陳三策一謂內地何用乎多兵宜盡抽之以過江可得六十萬或百里或二百里置一屯皆設都統七千里江面纔三四十屯設兩大藩府以總攝之緩急上下流相應二謂久拘使者在京湖何益不如遣使偕行啗緩其師期三謂若此兩說不可行惟有準備投拜賈得書大怒諷臺諫罷紫原歸金陵不數月北兵渡江

九江以下皆失守時人有詩云云

題蕪湖夢日亭

樓船犀甲下荊州蜂目將軍駐碧油虎帳覺來驚日墮  
龍媒嘶去逐星流姦萌問鼎終何在計落遺鞭始可羞  
幽草亂花荒故壘無人能作晉春秋

梅磻詩話

代意

懊惱鴛鴦未白頭却尋遺翠失芳洲離魂暗逐明珠佩  
遠目偏傷紫桂樓湘水渺瀰歸別渚隴雲容與澹新秋

菖花若有重開日得見菖花亦自羞

書西湖雷峯雲講主草書

雲師一生耽作草銀鐵蟠空覩天巧老來逸氣未全平  
筆底鋒鋷猶獨掃開關勇士爭赴敵劒戟弓戈奮相繚  
睡龍沒起求領珠劃木抓蟲紛怒爪風雷喧壓撼坤軸  
飛電交橫印清沼忽然天宇變空澄千丈孤峯立寒峭  
張顛驚號智永泣剥筋椎骨為君飽恨予不習草書訣  
九轉枯腸祇自攬雲師雲師汝誠能春蚓秋蛇幾時了

何如認取主人翁破衲蒙頭紙窗曉

以上詩永

譏賈平章

戎馬掀天動地來襄陽城下哭聲哀平章束手全無策  
却把科場惱秀才

西湖志餘御史陳伯大奏立士籍似道毅然行之凡應舉及免舉人州縣給籍一通親書年貌世系及所隸業于籍首執以赴舉過省參對筆跡異同以防偽濫時人有詩譏之云云

山丹花

亭下佳人錦繡衣滿身纓絡綴明璫晚來銷歇無尋處

花已飄零露已稀

煙紅露綠曉風香燕舞鶯啼春日長誰道使君貧月老  
繡屏錦帳咽笙簧

人間花木眼曾經未識斯花狀與名丹却青山暮春色  
續他紅樹墜時英

望仙花

風捲朱簾挂玉鉤  
絳雲開處望仙儔  
妍姿不逐春風去  
日照斜暉上小樓

玉手爐花

習習東風二月餘此花宜近玉庭除美人雲鬢不宜插  
獻與觀音作手爐

散水花

盈枝點綴雪花鮮環映清流分外妍應是東君歸騎速  
不知墜下玉絲鞭

孩兒花

纖穠初見似嬌癡鼓舞春風三月時何事自開還自落

可憐造化亦兒嬉

含笑花

薄薄沈熏骨英英玉煉烟惱人風味別斗帳夢中間

以上

全芳備祖

絕句

天目山前水齧磯  
心地脈露危機  
西周浸冷觚棱月  
未必遷岐說果非

古杭雜記度宗甲戌天目山崩京城騷動時有  
建遷蹕之議者未幾宋昀移有人作詩云云

和湯仲友弔賈秋壑故居

榮華富貴等浮花  
簪力難勝國爪牙  
漢世但知光擁立  
唐朝誰識杞姦邪  
綺羅化作春風蝶  
弦管翻成夜雨蛙  
縱有清漳人去也  
碧天難挽紫雲車

西湖志餘

刺賈秋壑詩

深院無人草已荒  
漆屏金字尚輝煌  
底知事去身宜去  
豈料人亡國亦亡  
理考發身端有自  
鄭人應夢果何祥  
臥龍不肯留渠住  
空使晴光滿畫牆



事到窮時計亦窮此行難倚鄂州功  
木棉菴上千年恨  
秋壑堂中一夢空  
石砌苔稠援步月  
松庭葉落鳥呼風  
客來未用多惆悵  
試向吳山望故宮

山房隨筆賈秋壑敗師亡國後有人刺以詩云

### 題賈似道養樂園

老壑曾居葛嶺西  
遊人誰敢問蘇隄  
勢將覆餗不回首  
事到出師方噬臍  
廢圃更無人作主  
敗垣惟有客留題  
算來祇是孤山好  
依舊梅花伴月低

山房隨筆

古碑文詩

乾淳老人氣岳岳破冠穿履行帶索撐腸拄肚書萬卷  
臨風欲言牙齒落

谷音云揭大中云武漁于潭得片石字十數行  
率磨沒僅識得二十八字意幽人憤世之作不  
合于時故沈之以俟知者

棲雲閣詩

倚天危閣貼重岡細路縈紆石磴長曲磴碧流疏宿雨  
夾山紅葉助斜陽

白鶴觀題壁

仙人未必皆仙去  
還在人間人不知  
手把白髭從兩鹿  
相逢聊問姓名誰

裴公亭

裴相亭成未退身  
空煩舞袖與歌塵  
至今亭上蕭蕭竹  
似對西風怨主人

以上四朝詩



宋詩紀事卷九十六

欽定四庫全書

集部

宋詩紀事卷

九十七至一百

詳校官監察御史臣李陽樞

侍讀臣孫球覆勘

總校官進士臣繆琪

校對官中書臣朱圻

謄錄監生臣蔣鳳姓

欽定四庫全書

宋詩紀事卷九十七

錢塘厲鶚撰

單氏

單氏一作華氏成都妓

句

帝王師不得日月老應難

送陳搏

吟窗雜錄

溫琬

琬字仲圭本姓郝氏良家子父歿流為陝倡通

翰墨尤長于詩蔡子醇訪得三十篇

寄遠

小花靜院東風起  
燕燕鶯鶯拂桃李  
斜倚紅牆卜遠人  
樓外春山幾千里

郡守命賦香篆

一縷祥烟綺席浮  
瑞香濃膩遶賢侯  
還同薄命增惆悵  
萬轉千回不自由

以上青瑣高議

周韶

韶杭妓

求落籍

隴上巢空歲月驚  
忍看回首自梳翎  
開籠若放雪衣女  
長念觀音般若經

侯鯖錄蘇東坡云杭州營籍周韶多蓄奇茗常與君謨鬪勝之又知作詩子容過杭陳述古飲之韶泣求落籍子容曰可作一絕韶援筆立成云云韶時有服衣白一座嗟歎遂落籍同輩皆有詩送之胡楚龍靚者最善固知杭人多慧也

胡楚



楚杭妓

絕句

不見當時丁令威  
年來處處是相思  
若將此恨同芳草  
却恐青青有盡時

後山詩話

送周韶落籍

澹妝輕素鶴翎紅  
移入朱闌便不同  
應笑西園舊桃李  
強勻顏色待東風

侯鯖錄

龍靚

靚杭妓

獻張郎中

天與羣芳十樣葩，獨分顏色不堪誇。  
牡丹芍藥人題徧，自分身如鼓子花。

後山詩話云：張子野老于杭，多為官妓作詞，而不及靚靚。獻詩云：云子野遂為作詞。

送周韶落籍

桃花流水本無塵，一落人間幾度春。  
解佩暫酬交甫意，濯纓還作武陵人。

侯鯖錄

周氏

周氏古田妓

春晴

瞥然飛過誰家燕  
驀地香來甚處花  
深院日長無箇事

一瓶春水自煎茶

贈陳筑

夢和殘月過樓西  
月過樓西夢已迷  
喚起一聲腸斷處  
落花枝上鷓鴣啼

夷堅志陳筑字夢和莆田人崇寧初登第為福州古田尉至官惑一倡周氏周能詩嘗以詩贈筑首句蓋寓筑字也

### 胡文媛

文媛汴妓歸河東茹魁

### 句

却有一端宜恨處  
開花相背有何功

續青瑣高議文媛云物之同本者開花則相背  
況二姓結一生之好能無反覆乎

### 楚娘

楚娘建昌妓後歸三山林茂叔

桂花

丹桂迎風蓓蕾開  
摘來斜插竟相偎  
清香不與羣芳並

仙種原從月裏來

吟堂詩話

盈盈

吳妓事詳王山詩後

寄王山

枝上差差綠  
林間蔌蔌紅  
已歎芳菲盡  
安能尊俎空  
君

不見銅駝茂草長  
安東金鑣玉勒雪花驄  
三十年前是  
俠少  
累累昨日成衰翁  
幾時滿飲流霞鍾  
共君倒載夕

陽中

夷堅志

謝金蓮

荅趙生紅梨花詩

本分天然白雪香  
誰知今日却濃妝  
秋千院落溶溶月

羞覩紅脂睡海棠

彤管遺編

梁意娘

述懷

蹤跡浮萍落五湖一番相別一番孤不知此去從何處

還許春風得見無

彤管遺編

蘇小娟

小娟錢唐妓

荅趙倅

君住襄江妾住吳無情人寄有情書當年若也來相訪  
還有於潛絹也無

武林紀事太學生趙不敏與妓蘇盼奴押赴官  
三載後有祿俸餘資囑其弟趙院判遺盼奴且  
言盼奴妹小娟俊雅可謀致之佳耦也院判至  
錢唐則盼奴一月前死矣小娟亦為盼奴所歡  
以於潛官絹誣扳繫獄院判言于府倅倅召出  
之付以所遺物小娟自謂不識院判何人及拆  
書惟一詩小娟默然倅命和之援筆書云云倅  
喜免其償絹脫籍歸院判偕老焉

襄陽妓

以下無姓名

襄陽妓建隆年中人

送武補闕

弄珠灘上欲銷魂  
獨把離懷寄酒尊  
無限烟花不留意



忍教芳草怨王孫

能改齋漫錄

老妓

題太平興國寺壁

曾趁東風看幾巡  
冒霜開喚滿城人  
殘脂剩粉憐猶在  
欲向彌陀借小春

楓窗小牘淳化三年冬十月太平興國寺牡丹紅紫盛開不踰春月冠蓋雲擁老妓題詩云云其妓遂復車馬盈門

臨川妓

郡守席上作

同是天邊侍從臣  
江頭相遇轉情親  
瑩如臨汝無瑕玉  
暖作廬陵有脚春  
五馬今朝成十馬  
兩人前日壓千人  
便看飛詔催歸去  
共坐中書秉化鈞

夷堅志張安國守臨川王宣子解廬陵郡印歸  
次撫安國置酒招郡士陳漢卿參會適散樂一  
枝言學作詩漢卿語之太守呼為五馬今日西  
州使君對席便成十馬汝體此意作八句技凝  
立良久即高吟云云安國數賞竟日賞以萬錢

宋詩紀事卷九十七